





1648 is

LA
RENCONTRE
DE
HENRY LE GRAND
AV ROY,
TOUCHANT LE VOYAGE
D'ESPAGNE. 17

M. DCXV.

THE NEWBERRY
LIBRARY

Case

F

39

326

1615xc

LA RENCONTRE DE HENRY
le Grand au Roy, touchant le voyage
d'Espagne.

MOn fils, seroit-il bien possible que la generosité de tes ancestres eust pris fin par la fin de ma vie, qu'elle ne voulust rebourgeonner en toy? que le coup qui eclypsa mes iours, brunisse aussi & voyle ton nom, le nom, dis-ie, des Bourbons, d'un nuage d'éternelle obscurité? Es tu encore si enfant ayant atteint l'âge de quatorze ans, de ne discerner ce qui te peut apporter de la commodité, avec ce qui te peut causer de l'ennuy? A cest âge ie portois desia l'espée au costé; mais non-pas tant pour la bien-seance, comme pour la deffensive: mais non-pas tant pour parade, comme pour l'empoigner au chastiment de ces rodomons Espagnols, qui de tout temps ont tasché & tascheront à iamais d'empieter & sur nostre nom & sur nostre patrimoine. Ignôres-tu les guerres que i'ay euës contre eux? Ne scais-tu point les victoires que Dieu & ma valeur m'ont fait obtenir sur eux. Et n'as-tu iamais entendu ce que durant la paix ils ont voulu brasser contre moy & mes Royaumes. Nul ne t'a-il declaré comment ils t'ont voulu faire mourir estant encores au berceau. Commēt ils auoient seduit à ta ruine quelques vns de mes plus valeureux & releuez subiets & seruiteurs. Souuray, les vertus & la vigilance duquel t'auoit rendu depositaire de vie, ne te fait-il point voir le comette des malheurs qui te menace par l'alliâce avec ce Marrane. Sa fidelité est-elle esteinte avec ma vie. Le mesme cousteau qui a causé ma

mort, auroit il point fait brèche à sa loyauté. Quel-
 qu'un le menace-il, s'il t'enseigne les chemins que
 ie luy auois commandé de te faire tenir, ou l'or d'E-
 spagne le fait-il te conduire par des sentiers retors,
 aguettez par ton plus grand & plus cruel ennemy.
 N'as-tu iamais esté touché de ma mort si cela est?
 n'as-tu iamais eu cest enuie de venger mon sang
 traistreusement espandu à la suasion du Castillan;
 mais mediatemēt par ceux que tu regardes de meil-
 leur œil. A ceste heure que mon ame repose là haut
 au Ciel avec les Heros & biē-heureux, faut-il que
 ma felicité soit interrompuē par les clameurs des
 gens de bien, des bons François qui demandent les
 Anges tuteurs de ce Royaume, qui crient à moy
 pour les secourir des griffes de ce Lion d'Espagne,
 qui veut engloutir sous le manteau d'un mariage:
 Alliance detestable qui te causera la mort, & la rui-
 ne entiere de tes pauvres subiets. Ne vois-tu que le
 iour de tes nopces est la veille assurée de ta perte?
 As-tu bien si peu de courage (si tu as iamais esté
 engendré de mes reins) de te vouloir allier à ceux
 qui sont les moteurs du parricide de ton pere? Par
 là tume ferois soupçonner de la chasteté de ta me-
 re, ne te ressentant de ma mort, & ne taschant plu-
 stost à la venger qu'à te ioindre par mariage avec
 les auteurs d'icelle: Au lieu de te faire dire de cha-
 cun imiter Alcide, tu te ferois proclamer un second
 Therfite. Ne regimbe donc contre l'aiguillon. Ne
 vois-tu pas les bons aduis du Prince de Condé ton
 cousin? Si tu les vois, que ne les ensuis-tu? Il tasche
 de prolonger ta vie, augmenter ton honneur, &
 maintenir ton Empire: Et tu cours au deuant de ta

mort, de ton deshonneur, & de la destruction de ta couronne.

Lors que le feu Comte de Soissons voulut mettre en auant le chastiment des perfides Conseillers de ma mort, & parler de l'empeschement de ceste funeste alliance, on luy en ferma le chemin par vne lettre empoisonnées, Le Duc de Vandosme, mes fils & tes freres naturels, ont esté mis en bute pour auoir esté trop fideles enuers toy, l'un a esté retint prisonnier au Louure, (rendre mon Louure participant de la tyrannie) & a failly d'en perdre la vie, l'honneur & les moyens : L'autre en a esté enuoyé comme en exil à Malthe : Quoy ? celuy que tu aymois tant, que tu cherissois tant, que tu embrassois si souuent, que rendois participant de tes plus secretes volontez, de tes ioyes, de tes plaisirs, par lequel seul tu iurois, par lequel seul tu te gouvernois, mais qui ne viuoit, & n'a depuis vescu, & ne viura que pour toy, tu as permis son bannissement. Aussi tu ne souffres qu'on se mocque de toy, quel'on se iouë de toy. On l'a enuoyé querir : mais on luy fait tenir le chemin de Rome, le chemin d'Italie. Et pourquoy à ton aduis, sinon afin qu'il recoiue en ces pais là quelque boucon ou quelque parfum qui luy accourcisse lentement ses iours, ie dy lentement à ce qu'on n'y prenne garde : Car s'il mouroit d'une mort subite on recognoistroit la fraude. Son aîné est ton frere, tu permets qu'un mareschal de Brissac luy face teste.

Peut estre ne luy a-il voulu seruir de bardache, qu'il luy veuille tant de mal. Mais non, car s'il l'en eust requis, il s'en fut ressentý iusques à la mort & sur la chaude. Tu endures qu'il ne soit receu pour

legitime gouverneur de Bretagne, gouvernement que ie luy ay donné moy mesme. Tu permets mes cōmandements ennulez, & tu veux que ie te croye mon fils. Si i'ay engendré ton corps, au moins n'ay ie pas engendré ceste tiennne pusillanimité de n'oser commander à baguette. Si dans la bastille i'ay fait sauter la teste d'un des plus vaillans & courageux hommes du monde, n'en scaurois tu faire autant à ceux qui te manient comme vn morceau de cire. Ceux de ton Conseil ioient de toy comme d'une pelotte. Ton petit cousin le Comte de Soissons, est trop ieune pour remuer les aisles; s'il estoit d'âge ie ne scaurois croire qu'il signast ton infelice mariage. Tes freres naturels de Verneuil, & Morel n'oseroient mouuoir les levres pour en dire, bien que i'eusse ce qu'ils en penseroient. Le Duc de Longueuille, ce braue Prince fait paroistre qu'il n'y cōsent pas: Il est fils d'un trop bon pere, pour s'accorder à ces meschancetez, il aimeroit mieux finir sa vie, que son honneur fust tant soit peu taché de ces maculs. Non, non, ce miserable Conchine en partie cause de ma mort, ne gagnera rien sur luy, bien qu'il fut accompagné de toutes les forces de ses amis. Ce gentil Prince ne scait que c'est d'estre gourmandé; pense tu que ce sage Duc de Mayenne se veuille embrouiller en ton alliance, le Comte saint Pol ne se laissera iamais aller à l'ord'Espagne pour consentir à tes nopces.

S'il a fait vne fois le voyage d'Espagne, ne scais tu pas que ce fut par cōmandement de mere, qui peut-estre, souhaittoit plus d'espouser Philippes, qu'elle ne desiroit que tu fusses ioint à l'infante. Quoy, souffrirois-tu bien que ce Marrane infectast

ma couche: La couche, dis- ie, de ton pere, la couche dis- ie, de ta mere. Ce sage Marefchal de Bouillon, vaillant, & vigilant aux affaires d'Eftat, s'il en fut iamais fur la face de la terre, voudroit- il bien s'accorder à ces detestables nopces. Et l'Efdiguieres grand guerrier & ferme de iugement, signeroit- il bien ceste horrible procedure? Nenny, ces deux icy se refouuiennent trop bien de l'an feptante deux, Ils n'ont perdu la memoire de la saint Barthelemy, vne tante fit celebrer mes premieres nopces par le sang innocent de beaucoup de milliers de creatures, Et vne niepce veut authentifier les tiennes du meurtre d'autant & plus de personnes. Les Guifars & Neuers font les chiens couchans, & a on endormy Vandosme & Rais: Mais demande leur- en aduis en particulier, ils nieront que l'effect d'un si execrable Himenée soit bon & necessaire ny pour toy ny pour ton Royaume. D'Espernon voit bien que la ruine despend de la negatiue de ceste alliance. Car si le conseil de ton cousin le Prince de Condé estoit fuiuy de vanger ma mort, sans doute, on trouueroit ce malheureux coupable: Ah! s'il eust voulu il eust peu empescher le coup: mais commēt empescher, puis que luy- mesme auoit induit ce desloyal Rauaillac à ce parricide. Et au lieu de le faire mourir cruellement avec luy, on l'entretient en ceste splendeur de colonnel de toute l'Infanterie Françoisse, au preiudice du serment ne donation que i'en auois fait à mon fils de Vandosme. Tu permets que l'on punisse l'Innocēt pour le coupable. *Dat seniam cornis sexat censura columbas.* D'Espernon est libre, le iuste accusateur estranglé mesch. dās les prisons. Le coupable est franc & quitte, & l'accu-

Patrie pleure sa captiuité & sa misere aux filles re-
 penties, ou plustost elle supporte avec patience les
 souffrances que l'iniustice regnante luy fait auoir
 pour salaire de sa Iustice. Bretigny me l'auoit bien
 dit, & i'estois incredule. Ce poltron de Conchine,
 qui n'a iamais essayé son espée (sinon traistreuse-
 ment sur vn pauvre clerc) pour recompense de ses
 desseruices à la France, se voit Marechal de Fran-
 ce. Ce desloyal il fit tuer l'autre iour vn bon Fran-
 çois dans Amiens: Il en a fait sauuer les meurtriers,
 & cependant le voila aux bonnes graces de ta Me-
 re, & cependant tu le carresse ; es-tu mon fils ? Ce-
 ste sorciere, ceste diablesse te gouerne à sa poste, &
 tu l'endures ? aussi bien ta-elle ensorcelé comme
 elle a enchanté ta Mere. Permets-tu que Cæsar
 soit en tes prisons de la Bastille, & que ceste Mege-
 re se promene dans ton Louure. S'il est coupable,
 fais-le punir : si son accusation est veritable, pour-
 quoy endures-tu qu'elle viue ? Si les yeux sont a-
 ueugles, tout le corps l'est aussi : si les yeux sont
 malings, tout le corps sera vicieux. Voy ce grand
 corps de ton Estat guidé par des meschans Con-
 seillers. Considere & la vie & les mœurs de ton
 Chancelier, Espagnol en son ame, s'il en fut ia-
 mais : de mon temps il n'estoit pas absolu, comme
 il est dans ton Conseil : aussi l'empeschois-ie bien
 d'estendre ses ailes, & de s'agrandir aux despens du
 public, ny du particulier : Mais à ceste heure, cou-
 steau tranchant des deux costez. Le voila grand
 pensionnaire & de la France & de l'Espagne : Chef
 de la faction Castillane, il attrappe de toutes parts,
 & à droict & à gauche. Les gros larrons font pen-
 dre les petits : il fist foietter dernièrement vn fauf-

faire, pour auoir contrefait les seaux, & n'est-ce pas
 encores pis d'en auoir la charge, & les employer à
 choses meschantes. Villeroy, cet esprit infernal &
 diabolique, subtil en toutes sortes de meschance-
 tez, s'il en fut iamais nay de Mere, faut-il que ses
 aduis soient des Arrests, ses dits des Edicts, & sa
 voix des Loix, luy qui de tout temps n'a vlé que de
 tromperies, & de tous genres de malice, c'estoit luy
 qui se seruoit de l'hoste à descouurir tous mes se-
 crets au Roy d'Espagne. A la bonne heure pour son
 maistre se noya ce meschant. Car estant attrappé
 vif, il eust decelé l'escolle, & les testes du maistre, &
 l'escollier eussent seruy de victime au Dieu du si-
 lence : ainsi à ceste heure ne te trahiroit-il pas ?
 Mais las ! où auois-je les yeux, quand i'introduisis
 en mon Conseil ce perfide Iannin ? Ne scauois-je
 pas que durant la ligue (desloyal qu'il estoit) il a-
 uoit signé ma mort, & m'appelloit Bearnois ? Ne
 deuois-je pas bien croire qu'imbu d'une mauuaise
 odeur, il s'en ressentiroit toute sa vie, il l'auoit si-
 gnée, Villeroy l'auoit escrete, Sillery scellée, mais
 tous estoient maintenus par le Chef de mon infan-
 terie, qui les y pouloit de iour à autre, & auoit iu-
 ré de les deffendre. A quelle occasion arma-il donc
 le Regiment de mes gardes, sinon afin qu'ils fus-
 sent tous (les traistres) en seureté contre les bons
 François, qui sembloient deuoir murmurer de ma
 mort, & les en accuser, & luy mesmement, puis que
 i'auois esté blessé aupres de luy, & qu'il m'eust peu
 sauuer s'il eust voulu. Ie ne scay si i'en dois accuser
 Montbazon, veu qu'il ne s'esmeut aucunemēt, ius-
 ques à tant que ie criay que i'estois mort, & me pé-
 chasse sur luy. Ce qui me le fait quasi croire, c'est

que ie voy que depuis ma mort, il ose leuer ses cornes à l'encontre de mō fils de Vandosme, ne le voulant recognoistre pour tel que ie luy auois commandé, toutesfois il auoit le dos tourné deuāt moy. Brissac ce sodomite, n'a il point trempé son ame dans mon sang, esprit capable de toutes sortes de trahysons, mais remply de poltronnerie, autant comme ses ancestres de courage: Mombarrot deuant qui ce poltron se mit vn iour à genoux pourroit bien dire s'il eust iamais la hardiesse de faire chose qui vallust, ny se trouuer aux coups dans la Bretagne durant nos guerres ciuiles. Il eust esté beaucoup plus necessaire de suiure le conseil de Diogeneaux Estats dernièrement assemblez, que de le menacer de mort, s'il ouuroit la bouche contre ceux qui ont causé tacitemēt la mienne. Si i'eusse vescu i'eusse bien empesché la grandeur & l'opulence de ces rustres Conseillers d'Estat; ie leur eusse tenu la bride de si pres, qu'ils n'eussent sceu faire les cheuaux eschappez. Si Seully eust esté continué en sa charge, la bastille, ne seroit auourd'huy vuide de thresors, comme elle est, les petits coquineaux qui se sont enrichis de tes despoilles ne seroient si magnifiques cōme ils sont, Bullion ce pourceau, n'auroit deuoré comme il a fait, vn million de liure à sa part, Pontchartrain cest ignorant ne seroit haut & puissant Seigneur cōme il est, Laumenie cest esprit autant trauersé que ces yeux, n'auroit acquis tant de biens. Philippeau ce rusé, n'auroit la bourse si biē ferrée. Dolé ce frauduleux n'auroit mis la main dans les thresors que i'auois assemblez, non sans cause porte-il ce nom, puis qu'il est tant remply de dol. Arnault ce feint religieux n'auroit pesché se-

Ion son insatiable avarice, dans ces coffres de la Bastille: Maupeou n'auroit englué ses mains dans l'or & l'argent que i'auois amassé. As-tu bien enduré que les Cardinaux de Sourdy & du Perron missent en auant, que tu n'estois seigneur temporel de tout ce qui est enclos au cercle de ta Couronne: & tu ne les as chastiez de leurs temeritez; encores l'vn voulust il dire iniure à ton cousin le Prince de Condé buis'y opposa. L'Euesque de Chartres a esté beaucoup plus homme de bien que ces deux prelates: car il maintenoit dernièrement entre plusieurs que l'alliance d'Espagne estoit tres-dangereuse à la France, & qu'il vaudroit mieux que la peste fust espandue par tout le Royaume, que si ces detestables nopces se faisoient: Aussi est-il sorty d'un pere bon François, & homme de bien: c'est la raison qu'il l'ensuiue, qu'il l'imite aux effects de sa vie, suiuant ce Prouerbe:

Sape solet similis filius esse patri.

Mais quel plus meschant homme as-tu en tout ton Royaume, & plus factieux que ce Cheualier de Sillery, la teinture de son nez tesmoigne celle de son cœur, le rouge (liurée de Castille) y paroist assez: Il fust Ambassadeur en Espagne pour ton mariage & receut de grands dons de Philippes, pour te mentir des fausses perfections del'Infante, il receust de grands deniers afin qu'il te teust qu'elle auoit les escrouelles en yne hanche. Bref, tous ces petits maquereaux de la tyrannie Espagnole ne se feroient surhaussez en grandeur si Seully eut esté continué en sa charge. Mais le principal subiet qui le fit demettre de la garde de tes thresors fut l'aduancement de ce miserable Conchine, que ta mere

vouloit surhauffer en grandeur, voire pour égaler & contrequarrer s'il eust esté possible les Princes de ton Royaume.

Pourquoy durant ma vie ne m'apperceus-ie de tant d'affections: ie l'eusse fait rongner par vn bout, mais par le haut bout, afin qu'il n'eust peu plus se hauffer. Il n'auroit iamais esté ny Marquis ny Marefchal d'Ancre. Ie l'aurois bien empesché de faire porter le bonnet à la France. Auois-ie tant assemblé d'or & d'argent pour vn coyon, pour luy faire faire de la vasselle, des arrousoirs de iardins, des canaux & autres grands vases. N'estoit-ce point plustost pour maintenir ta grâdeur contre ce monstre de Castille, qui la veut engloutir. L'or & l'argent ne sont-ils les nerfs de la guerre. Si i'ay fait la guerre sans argent, sans places, sans soldats? penfes-tu que tout le monde se puisse de mesmes.

Non omnibus licet adire corinthus.

Tu es bien ieune & trop peu experimenté pour imiter mes stratagemes. Par tō alliâce avec l'Espagne, tu rōps celle que i'auois iurée aux Roys d'Angleterre, Dannemarc, de Suede, Polongne, au Duc de Sauoye, aux Venitiens, aux Princes protestans d'Allemagne, aux Suisses, aux Geneuois, & à ce prudemment vaillant & vaillamment prudemment, capitaine Maurice de Nassaut. Ayme-tu mieux la guerre contre tous ces grands Princes & Republiques, que contre cest escroüellé, que contre ce marrane que contre ce tyran Philippes, qui en fin se preuadra de ton peu d'ambition & te couppans insensiblement l'herbe fous le pied, t'arrachera la Couronne de ton chef, la Couronne, dis-ie, que tes ancestres ont si longuement gardée contre ce dra-

gon des Pyrenées qui la guette.

Pour lors tu seras contraint de recourir au secours à ceux dont tu auras rompu l'alliance : Mais qui daignera pour lors entendre tes gémissements : non pas vn seul, puis que tu auras preferé l'amitié d'Autriche à la confederation de tous les autres Princes Chrestiens. O Dieu quel nuage de malheurs voy-ie se preparer pour esclatter sur ce pauvre Royaume. Ceux de la Religion commenceront à esprouuer la barbarie Castillanne : On leur escrit desia l'inquisition en grosse lettre, pour te l'apporter & te la faire iurer. Ceste partie de l'Estat perduë, que tout le reste de la France appreste son col au ioug de la seruitude, & toy prepare toy à estre tributaire de ce Bazané ton beau-frere. Mais auant, pauvre Royaume, fay tes preparatifs aux guerres ciuiles. Certains prescheurs de diuision osent parler desia publiquement en chaire de confondre les huguenots, c'est la ruine totale de ton Estat. Mon fils ce sont eux à l'ayde desquels i'ay dompté les rebelles de la ligue, à leur secours ie menay battant l'Espagnol hors de mes terres Francoises & tu permettrois leur crime? & ie croyois t'auoir engendré, & ie t'appellerois mon Enfant : Suy mon conseil & ne te laisse mener à la volonté de ces perfides Conseiller, qui cherchent leur aduancement en ton declin, qui cherchent, dis-ie, leur profit en ta perte. Fay-toy cognoistre estre Roy, & dis qu'il n'est encores temps de te marier : que tu ne veux vne fême à la poste d'autrui : que tu n'as pas encores les reins assez forts à supporter les charges du mariage, que tu ne veux apporter les escroüelles à la race des Bourbons. Songe plustost à venger ma

mort, qu'à chercher alliance avec ceux qui me l'ont causée. Ne vois-tu pas qu'on te nourrit à des actions enfantines plustost que Royales : On te retire des affaires d'Estat, à celle fin que tu ne saoures les douceurs d'un Sceptre, au lieu d'occuper ton esprit à des choses relevées, à des faits Royaux, on te barbouille la fantasia de mille petite folie : on preoccupé ton esprit de mille sortes de badinages, au lieu de t'entretenir de maximes d'Estat : on te met deuant les yeux un nombre de mille petits oyselets, de petits chiens, de petites niaiseries, plus propres à amuser les enfans de lait qu'à faire voir à ceux qui en leur majorité ont à gouverner un Royaume. Ce ne sont occupations dignes d'un Roy. Releve ton esprit en haut, Enquiers Souverain ton Gouverneur des choses hautes : & ne luy demande point pourquoy ce moyneau est blanc ou tanné : Mais bien pourquoy on te veut empêcher de te trouver au Conseil, ou si tu t'y trouves pourquoy on t'en fait retirer si subitement, si ce n'est point pour crainte qu'on a que tu reconnoisses la malice de ces pernicious Conseillers. Garde-toy bien de les croire ces desloyaux, qui te veulent contraindre à te marier contre la volonté des gens de bien, à ta ruine entiere & perte totale de ton Estat. Suis mon conseil, écoule du leur, croy mes paroles, & juge leurs discours trompeurs. Ils ont fait mourir le pere, ils veulent tuer le fils, & ruiner les subiects. Ils ont pillé la Bastille, ils ont volé tes coffres, ils ont mangé ce que ie t'avois amassé : Ils veulent encores succer jusques aux moüelles, & t'empêcher de t'enquerir & d'y prendre garde. Casse-les, confisque leurs biens à ton usage. Remets en tes coffres ce

qu'ils y ont desrobé, Et chastie-les exemplairemēt, crée des nouueaux Conseillers, il y a des gens en ta France & plus gens de bien & plus habiles qu'eux, qui ne se laisseront peser à la balance au poids de l'or : L'auarice ny l'ambition ne les maistriseront point : ils ont les ames trop iustes, les cœurs trop bons, & les esprits trop solides, pour se laisser aller aux suasions de l'Espagnol, faits exercer la Iustice, fais punir les meschans, conserue les gens de bien : N'endure vn traistre, ny vn auare en ton Cōseil, ny en tes Parlements. Aduance aux charges publiques ceux qui en sont capables, Ne sois trop credule, ne donne trop de pied aux estrangers, & ne les mets aux offices premiers, sinō par mérite, & pour auoir esté recogneus par vn long temps tres-fideles, irreprochables, & qui ne se laissent gagner par argēt : C'est ce qui m'occasiona à esleuer à la Mareschaussée de France (quoy qu'estranger) ce vaillant & sage Alphonse d'Ornano. Mais vn Conchine, quoy ? Quelle vertu a-il iamais tesmoigné ? Par quelle genereuse action s'est-il iamais fait paroistre ? En quoy son courage, son Esprit & sa fidelité, ont-ils meritē les charges ausquelles il est esleué ? Ah ! que si i'eusse ves-cu iusques à ceste heure, que ie l'eusse bien fait esleuer d'une autre façon, mais à vn gibet, à vn eschafaut, à vn bucher, là où ie luy eusse fait rendre conte de ses demerites au lieu de merites. Et cependant le desloyal qu'il est, il obtient les premiers rangs en mon affection : Aymer ceux qui m'ont fait mourir ? Et ie croyrois t'auoir engendré ?

Prends garde à toy, car tes perfides ne tascheront qu'à te perdre. Ah ! mon fils, venge mon sang espan-du traistreusement. Informe-toy subtilement &

courageusement des parricides de ton pere, & venge ma mort, si tu veux estre creu mon enfant. Escoute mon tumbau qui t'appelle, il te demande vengeance, ne luy ferme les entrailles de ta pitié, donne-luy relasche à ses plaintes, & appaise ses sanglots. Pour ce faire ensuis mon conseil, conseil difficile, que te donne ton cousin : & garde-toy de te mesler parmy ces Bazanez Espagnols, qui ne cherchent que ta perte. Tes nopces seront sanglantes, voire plus que les miennes premieres n'ont esté. Desmets-toy donc de ceste alliance, & déments-les volontiers de ceux qui te veulent faire precipiter sans consideration en vn gouffre de malheurs & de repentirs. Et suis la sente que ie t'enseigne, & par ce moyen tu ne courras risque de ta vie, ny de ta Couronne, afin que chacun puisse crier viue Louis de Bourbon nostre Roy legitime successeur & des vertus & du sceptre de son pere, & second restaurateur de nostre liberté. Adieu donc, mon fils, ie m'en retourne en mon repos, où ie te prépareray place à te receuoir vn iour à venir.

